



Kamis, 14 Desember 2023

Ogen: Juna 4:9-11



"Perkuah Ate Tuhan"



Syair lagu KEE 212:4 "Perkuah ate si mbelin, simahan dame e, bengketi pusuh kami min, lah kami senang je." Syair lagu enda nuriken maka perkuah ate Dibata erbahansa kita datken kedamen, keselamatan, keriahen bage pe pengalemi dosa. Adi la erkiteken perkuah ate Dibata labo kita banci ndatken kedamen, keselamatan bage pe pengalemi dosa.

Bangsa Niniwe e me sada bangsa si mbelin, bangsa si erbahan jahat i lebe-lebe Dibata, bangsa si la megiken dengen ngikutken undang-undang Dibata, bangsa si la mbiar dengen malang man Dibata, bangsa si lagu langkahnna macik dengen nggesuh, bangsa si la mediate nandangi bangsa sekitarna. Kerina kejahatan bangsa Niniwe tangkas kap i lebe-lebe Dibata, erkite-kiteken kesalahan bangsa e, maka Dibata ersura-sura lako ngukum bangsa Niniwe. Dibata nuruh sekalak suruh-suruhan lako mpeseh berita e. I bas kata si nggo i peseh nabi Juna man bangsa e; tergerak pusuh anak kuta Niniwe lako mperobahi lagu langkahnna. Itetapkenna gelah kerina anak kuta erpuasa (la banci man kai pe ras minum kai pe) dengen make uis guni subuk raja bage pe kerina rakyatna. Jenari teptep kalak arus tutus ertoto man Dibata dengen itadingkenna kerina perbahanen si jahat si nggo ilakokenna. Dibata ngidah perbahanen anak kuta Niniwe e maka salih ukur Tuhan guna nehken perkuah ateNa man bangsa e.

Tuhan nehken perkuah ateNa nandangi bangsa Niniwe, Tuhan la jadi nehken ukumen man bangsa e erkiteken i idah Tuhan kerna pertobatan bangsa Niniwe. Ukumen si salihken Tuhan jadi kedamen; ukumen isalihken Tuhan jadi keselamatan; ukumen lanai idabuhkan tapi Tuhan ngalemi kesalahan bangsa e. Perkuah ate Tuhan erbahansa bangsa Niniwe ndatken keselamatan; lanai ndatken ukumen. Perkuah ate Tuhan si njamini kegeluhen bangsa Niniwe.